

NBB nung Life Member ama Lepzungchiba Jamir shimokogo



Hotel Japfü nung June 3, 2024 nü Lepzungchiba Jamir nem tenüngsang agütsüba sentong nung pai o jembidang tangokba noksa angur.

Dimapur, Aami/June 03 (TYO): Naga nunger rongnungi mezüngbuba National Bee Board nung Life Member, Category (A) Corporate Member ka ama Lepzungchiba Jamir shimogo, aser iba nüngtem nung pa tushia Hotel Japfü nung June 3, 2024 nü sentong ka agia liasü.

National Bee Board (NBB) ya 2006 küm June ita tanaben tentetshi aser iba NBB

nükjidong ya India nung Scientific Beekeeping ajungketa ninang metsüba nung terenlok bener arudaktsütsü aser pollination ajanga ninang mojitzü tali agizüka ninang metsürtem rongsenketzüng tajungba kumdaktsütsü asoshi lir.

Lepzungchiba Jamir-i iba sentong nung jembidang, iba jenjang moatsüba aser alizüng tongtetdaktsüba atema Tsüngrem nem tenüngsang

agütsü aser Nagaland Ecological & Sanitation Management Society tenüng nungi National Bee Board (NBB), Ministry of Agriculture & Farmers Welfare, Government of India nung Life Member Category (A) Corporate Member ngutetba atema pelar ta ashi.

Iba jenjang tongtetba ya kü kisüngi ajangetba masü saka arok teyaritep ajanga lir, ta pai ashi.

Tanur ka anitetsü atema yimtsüng ka nüngdaker aser yamaji nükjidong tajung aser tulu tongtettsü atema aroki shilem agitsü nüngdaker, ta pai ashi.

Nisung ka tejangraba nung yaritepa aintsü asoshi maongka agütsütsü asoshi nübur teyari nüngdaker, ta Lepzungchiba ashi.

Paisa mapa tasen inyaktsü janrar ta ashi aser nüburtem dang maneni yariteptsü aser teka amteper inyaktsü ayongzüka liasü.

Sangtemla Ward nungi Wb.I.Tali Longkumer ULB election nung noktaksü sangdongba sentong aka



Wb.I.Tali Longkumer-i ULB election nung noktaksü sangdongba sentong jembidang tangokba noksa

Mokokchung, June/Aami 23(TYO): Mokokchung nung Mokokchung Municipal Council(MMC) kübok Urban Local Bodies(ULB) election agitsü aliba nung Sangtemla Ward nungi candidate Wb.I.Tali Longkumer-i tanu Sangtemla Community Hall nung Sangtemla yimden aser Sangtemla nübur matsüngdang pa ULB election nung noktaksü sangdongba den ano pa nükjidong lemsatepba sentong ka ayongzüka kaogo.

Tanu iba sentong nung Wb.I.Tali Longkumer-i candidate ka ama pa nükjidong lemsatepdang Sangtemla ward nung pa Finance Secretary küm 5, Executive member küm 5 aser Chairman küm 5 ta inyaka aruba mapang nung takok tashi inyaka aruogo, tali chairman inyakba mapa terenlok mapa aika inyakaka ano Sangtem ward nung aser Mokokchung town nung teinyaktsü mapa aika lirta reprangtetba lemsatep.

Paisa küm ana asem tejaklen nungi nüburtemi pa nübu nüngtakerta asüba agi pai iba ULB election nung noktaker, anungi nübur taginüba angateta inyaltsü talisa Mokokchung town nung tzü atema kanga dang khuret tulu lir, iba den külemi urban

amenities, lenmang, streets lights, sanitation aser nübur nüngtakbatem reprangteta inyaktsü temelungtetba nung ULB election nung noktaker adenshia aliba yimden yimsüsür aser nüburtem dang metetdaktsü.

Sangtemla Ward-ji Mokokchung town nung tongtipangtiba ward ka lir, Sangtemla ward ya tangar asoshi Mokokchung noksa lir, kechiaser iba ward nung Deputy Commissioner-i anir

tulur timba aliba kiyong lir, Govt. aser Private office 31, bank 6, arogo balala tenla ki 6 lir aser Mokokchung-i arurtemi iba Sangtemla ward majangi maor, anungji ward nüburtem tangar ward dang nungi inyakyim libaliro ajak nung tera temaba nung alitsü nungtakerta reprangteta khuret ka ama bilema iba election nung Sangtemla nübur meyongtsü takum tenla aguja noktaker candidate Wb.I.Tali Longkumer-isa adenshia alirtem den lemsatep.

Iba sentong nung Tsüngrem lenisüba jazüka Wb.Limasashi Pongen Deacon ajanga sarasadema tenzü, Sangtemla ward yimden tenung Wb.Lipokmeren jembi, phukumer tenung nung tebutam tenung nung Wb.K.Lanu-i(Ex MTC member), phukumer tetsürtem tenung nung Wt.R.Sentila jamir-i jembi aser Lanurtem tenung nung Sb.Achipong-i Wb.I.Tali Longkumer indang kuli tajung agüja Wb.I.Tali Longkumer nungittsü asoshi adenshia alir Sangtemla ward sanger ayongzüker aser tatem nung telok külemi sarasadema sentong tembangba den Wb.Longriwati Imchen ketdangsüba nung sentong agia liasü.



Town Hall, Mokokchung nung June 3, 2024 nü 18th Lok Sabha 2024 atema General Elections atema AROs, Counting officials /Staffs tem asoshi training agia liasü.

Kohima nung aliba office ajunga nung lokti nübuttsük alitsü

Dimapur, Aami/June 03 (TYO): Kohima District Disaster Management Authority (DDMA) ajanga telemtetba agiba ama aser meyi mapang renema alitsü atema shilem ka ama, Kohima jila nung kilentzü aoba lenmangtem mürektetsü mechi June 6, 2024 anepdang 6:00 ako nungi lokti nübuttsük ka Kohima jila nung alitsü, ta Deputy Commissioner, Kohima, Kumar Ramnikant IAS ajanga sangdong ka nung metetdaktsü.

Iba nübuttsük nung Kohima nung aliba District Offices ajak den Kohima Municipal Council (KMC) adentsü. Iba dak sendakba nung district nung aliba Heads of Offices ajunga dang item mera agitsü metetdaktsü;

Shilem agir ajaki mapa nung nüngdakba hadir aser osettsüset bener arutsüla.

Jana-reja bendena indoktsü atema gari aser osettsüset anepalutsü lezmükja aliba Offices/department temi nüngdakba oset asadanga renemtsüla.

KMC jana indokba tesem nung jana shidak bendena indoktsü atema team leaders tem mapa asütsü, ta sangdong ajanga ashi.

Iba lokti nübuttsük nung offices/department ajaki tashi anga shilem agitsü ayongzüker, ta ashi.

Iba nübuttsük atema Rhosietho Nguori, ADC Kohima (9612581203) ya over all in-charge asütsü, ta metetdaktsü.

Old Jalukie village anasa anentsüh alua lenmang shibanga lir



Dimapur, Aami/June 03 (TYO): Old Jalukie Village anasa June 2, 2024 nü anentsüh tulu aluba ajanga Peren Town aser Jalukie Town sendaktepba National Highway-129A (tang teyangludak) lenmang mokdanga lir, ta Additional

Deputy Commissioner, Peren, Japheth Woch-i sangdong ka nung metetdaktsü.

Anungji iba lenmang nung senzürtem Peren town nung Old Peren-Jalukie nungi Upper Jalukie leni aoba lenmang amshitsü metetdaktsü.

Dimapur DPDB senden June 6 nü amentsü

Dimapur, Aami/June 03 (TYO): Dimapur asoshi District Planning & Development Board (DPDB) senden June 6, 2024 nü amentsü, ta Deputy Commissioner & Vice Chairman, DPDB Dimapur, Dr. Tinojongshi Chang, NCS ajanga sangdong ka nung metetdaktsü.

Senden ya anepdang 11:00 ako nungi tenzüka DC Dimapur indang Conference Hall nung amentsü.

DC Dimapur ajanga June 3, 2024 sangdong ka nung DPDB züngsem ajak iba senden nung medema arua adentsü ayongzüko.

Longleng nung June 6 nü 72 buba Phom Day amungtsü

Dimapur, Aami/June 03 (TYO): 72 buba Phom Day (Peace Day) aser 4 buba Triennial Peace Summit sentong June 6, 2024 nü Public Ground, Longleng nung agitsü.

Phome nunger aliba tesem nung tekolak bushiba putu tembangba aser Phom nunger tsüngta tesunep aser yimjung tenzüka temaitsü Phom Day ya amunger.

Iba sentong nung Convenor, Forum for Naga Reconciliation; Former Principal, Oriental Theological Seminary (OTS); Asia Pacific Ambassador aser Baptist World Alliance Peace Award sempet angur Dr. Wati Aier tesemdangertongti alitsü.

Head dobashi asür Hamnyei aser asür Yongtau nungeri anir yimtsüng balala nungi tantsü-tambo Longleng nung June 6, 1952 nü adenshia tekolak bushiba yimya anentsü telemtetba agia Phom nunger temi yimjung nung alitsü nangzüktepa liasü.

Tanü Lok Sabha election agiba vote zünga osang sangdongtsü



June 03, 2024 New Delhi nung osangbenertem senden ka nung Chief Election Commissioner of India, Rajiv Kumar (tiyong) den Election Commissioner ana- Gyanesh Kumar aser Dr. S.S. Sandhu nunger tangokba noksa nung angur.

New Delhi, Aami/June 03 (Agencies): April 19 nungi tenzüka June 1 tashi nung Lok Sabha elections shilem tenet lemsar agia aruba sülen June 4 nü vote zünga osang sangdongtsü.

Hombarnü Election Commission of India (ECI)-i sangdong ka ajanga, "General Election 2024, Andhra Pradesh aser Odisha na nung state Legislative Assemblies election aser Assembly Constituencies nung bye election agiba votes June 4, 2024 (Mongolbar) anepdang 8:00 ako nungi tenzüka azüngtsü," ta metetdaksü.

June 4 nü Election Commission of India-i vote azüngba osangji methitemi

online ajanga metetdaksütsü, anungji nüburtemi ECI indang official website results.eci.gov.in nung reprangtsü akok, ta Election Commission-isa metetdaksü.

Hombarnü New Delhi nung osangbenertem senden ka nung ECI-i, taküm Lok Sabha election nung tetsür crore 31.2-i shilem agiogo, aser ajak senteperbo nisung crore 64.2-i vote agütsüba ajanga India-i alima nung otsü tasen ka yanglutetogo, ta metetdaksü.

Chief Election Commissioner (CEC), Rajiv Kumar-i, alima nung agiba election tulutiba nung monitoring team 68,000 aser polling ketdangser/sepai crore 1.5-i shilem agia liasü, ta metetdaksü.

June 2 nü opposition INDIA teloktep nungi lenirtem telok kati Election Commission nung ketdangsertem ajurua takhangba kar agütsüba dak sendakba nung Rajiv Kumar-i, "Onoki temepishiba ajakji agizükogo," ta ashi.

Paisa, "Parnoki akhangba ajakji EC inyakyim nung lir. Iba inyakyim ya tesüiba küm 70 tashi tesem balala nungi nisung lakh aikati rpranga lia inyaker. Onoki video conferencing ajanga ROs aser AROS ajak dang telatetba nung aliba ama shidak inyaksüla, ta tuyuogo. Onoki CEOs (chief electoral officers), ROs, yimtenren party tem aser district level tashi nung nisungtem nem training agütsüogo," ta metetdaksü.

Opposition INDIA teloktepi menden 180-195 angutsü: AI Exit Polls

New Delhi, June 03 (Agencies): Lok Sabha election agiba osang sangdongtsü joko anogo ka dang lia Hombarnü Zee News AI exit polls ajanga, BJP-i aniba NDA teloktepi Lok Sabha menden 305 nungi 315 tashi nung takok angutsü aser Congress-i aniba INDIA teloktepi menden 180 nungi 195 tashi angutsü ta asadangtetba sangdongogo.

Tanünga party temi menden teimba agia 52 tashi dan angutsü, ta parnokisa metetdaksü.

AI Exit polls ajanga, BJP-i aniba NDA-i majority ngua sorkar akümtsü, ta metetdaksü.

Ajisüaka Maharashtra aser Bihar ama state tem nungbo INDIA teloktepi menden aika angutsü, anungji item states nung BJP jenjang majungtsü, ta parnokisa metetdaksü.

Zee News AI exit poll ajanga ashiba agi, Bihar nung NDA aser INDIA teloktep tsüngda menden kasasa (50-50) shi angutsüa akok.

Lok Sabha menden 40 aliba Bihar nung NDA-i menden 15 nungi 25 tashi angutsüa akok aser INDIA teloktepi menden 15-25 shi angutsüa akok, ta parnokisa metetdaksü.

2019 küm Lok Sabha elections nung Bihar nung NDA-i menden 39 tashi nung takok nguteta liasü aser

Congress-ibo menden ka nung dang takok angu.

AI exit poll ajangasa, Maharashtra nung INDIA teloktepi menden aika nung takok angutsü; Lok Sabha menden 48 aliba state nung NDA-i menden 26-34 shi nung takok angutsü aser INDIA teloktepi menden 15 nungi 21 tashi nung takok angutsü, ta metetdaksü.

2019 küm Lok Sabha elections nung Maharashtra nung NDA-i menden 41 nung takok angu aser Congress-i aniba UPA teloktepi menden 5 angu. Tanünga menden anaji AIMIM nungi candidate ka aser independent candidate kati ngua liasü.



June 03, 2024 nü Chennai nung Tamil Nadu Chief Minister, MK Stalin den par jabaso Udhayanidhi Stalin, aianu Kanimozhi Karunanidhi aser DMK lenirtemi taoba mapang state chief minister M Karunanidhi asoba anogomong nung asür nem akhüm agütsüdang tangokba noksa nung angur.

LS election nung kin aser yimsü nung ajemdaker vote ayim

New Delhi, June 03 (Agencies): June 4 nü Lok Sabha election osang sangdongtsü lia yimtenren tsütsü mongintemi, taküm Lok Sabha election ya telemsa adokdaksütsü kanga jembiba küm ka liasü, aser iba election atema nüboyimba mapang nung party temi vote angutsü nükjidong nung kin aser tamangba yimsü amshia liasü, ta metetdaksü.

BJP-i Hindutva kübok backward kintem züngoktsü atema jembiba aser opposition INDIA teloktepi caste survey agütsü, ta nangzüka Other Backward Caste (OBC) voters mesüzüktsü merang, ta yimtenren nung mongintemi metetdaksü.

Association for Democratic Reforms (ADR) tentetertem rongnung ka, Jagdeep Chokari, telemsa adokdaksütsüsa kanga jembiba election rongnung taküm election ya asütsü, ta ashi.

Osangbener den jembidang pai, "Kin, tamangba yimsü aser region nung ajemdaker telemsa adokdaksütsüsa kanga jembibogo. Iba küm ya taoba mapangtem ama masü. Election mapang nung kanga tongtibang onüktem rongnung kin ya lir, ajisüaka taküm election nungbo kin aser tamangba yimsü naprongla nung ajemdaker politics asayaogo," ta metetdaksü.

Aligarh Muslim University

nung associate professor, Dr Iftekhar Ahmad Ansari-i, "INDIA teloktepi mapa manguba aser jenjang atuba tebilemtsü onüktem süokba den külemi parnokisa election nung takok ngura caste survey agütsü, ta nangzükbaji BJP indang OBC vote bank asalentong anema liasü," ta metetdaksü.

Ansari-i, Uttar Pradesh nung Samajwadi Party-i 'PDA' (Pichda, Dalit, aser Alpsankhyak) teloktep tentet aser Bihar nung 'MY BAAP' (Muslim, Yadav, Bahujan, Agra, Adhi Abadi aser Poor) teloktep tentet, ta metetdaksü.

Paisa, Maharashtra nung Marathas aser Muslim nungertem Shiv Sena (Uddhav Balasaheb Thackeray) kübok longjem aser Tamil Nadu o Karnataka ama state tem nung OBC nung ajemdaker politics asaya, ta metetdaksü.

Ajisüaka Jesus & Mary College nung Political Science professor, Sushila Ramaswamy-ibo, kin aser yimsüji tongti kulitem lir, ajisüaka ibaji ajanga kangabo mekonghir, ta ashi.

"Kin aser yimsü ajanga kongshibaji telatetka dang lir. Akhidang ama masü saka tangbo nüburtemi taküm jenjang tajungba liner," ta Ramaswamy-i ashi.

Laisa, tangbo nüburtemi pei maitsü dang nungibo rongsenkettzüng tsütsü maongka aser tarutsü jenjang ang tongtibangba kümdaksü, ta ashi.



June 03, 2024 nü Thiruvananthapuram nung KPCC Gandhi Darshan Samithi züngsemtemi longkak aitba sentong ka nung Congress lenir, Shashi Tharoor-i Mahatma Gandhi taküm otsü kakat ka Ato kilonser Narendra Modi dangi 'post' asüdang tangokba noksa nung angur.

Odisha nung tsüngi lendong nung nisung pezü asü

New Delhi, June 03 (Agencies): Odisha kübok Ganjam district aser Khurda district na nung tesem balala nung tsüngi lendong nung nisung pezü süogo, ta Hombarnü police ketdangsertemi metetdaksü.

Asürtemji Ganjam district nungi Sanyashi Sahu, Lambodar Panigrahy aser Sanjay Gouda nunger liasü aser Khurda district nungi Dugun Pradhan liasü.

Pattapur nung Sahu aser Pradhan na tanur kazütsü ayokba mapang nung tzünglu aruba agi süngdong ka anasa jenoka aliba mapang nung tena dak tsüngi yalok.

Pattapur police station nung inspector in charge, Ajay

Kumar Swain-i, "Onoki tena süchia orr lia anguba sülen Digapahandi nung aliba hospital kati anir ao, ajisüaka tena sür bener aru ta doctor temi ashi," ta metetdaksü.

Badagarh police station nung inspector in charge, Sandhyarani Singh-i, Amongnü Panigrahy dak tsüngi yalokba sülen pa Badagarh hospital- anir ao saka mekümzükteti asü, ta metetdaksü.

Hinjili police station nung inspector in charge, Srinibash Sethi-i, Amongnü Sanjay Gouda dak tsüngi yalokba sülen pa Hinjili nung aliba sub-divisional hospital-i anir oa yari, saka mekümzükteti asü, ta metetdaksü.



TIR YIMYIM YIMOBILEM (EDITORIAL)

DIMAPUR SANGTENNÜ, JUNE (AAMI) 04, 2024

Tepuokdaki aotsü metsübur !

Linük nung ken ashitsübo tajung kaji, nübertem asoshi ketdangsüba mapatem nung meshitak aser ochimashi inyakbaren nung yimten yimsüsürtem tepuokdaki yokba ya asütsü. Atangji, parnok dak tai ali asü mali, ajibo obendangertemi dang ashitsü, ajisüaka iba ama temerenshi jaagi yimten yimsüsür aser ketdangsertem kümdangshidaksür aser yimten nung ochimashi inyakba mapatem ajema kümdaksür. Ajisüaka, ano külenbo yimsü tesüdak pur teloktem den adener rongnungbo ochimashi mapa inyaker kata mali ama, shinga daka metangshii yutsür opposition nung alirtem dang tepuokdak yokba yagi, mapabo ochimashi mapa anema inyaker saka inyakyimji meindang asütsüa akok. Atangji, pei telok aser pei government nung adenertemi meshitak inyakyonga, nisunger yimya nung, parnok tepuokdaki yoktsüsa inyaktsübaji tasak, iba jagi meyoker südi. Ajisüaka, yimten nung asen den adenertemi meshitak inyakba mapatem atemabo odang yutsütsü saka asen den madenertemibo langka nung danga temulung malemtsüsa inyakra, jet ta pur tepuokdaki yoktsü ta asüba kisung agibo ochimashi tongpang makoktsü. Ochimashi mapa yabo aseni inyakba o tangari inyakba na kasa dang, anungji kasa tamajung aser nübertem nem kasasa takoksa bener arutsür. Anungji, pei kibong aser pei lima meimeribo asen pi ta mali, meshitak inyakerterem nembo kasasa temerenshi agüja metongshitsür. Iba amaji ka mesüi asen den alirtem dangbo kecha mashitsü saka tangarbo ola tashi adoka majung merenshitsü ta süra, tamajung aser ochimashi mapa inyakerterem ajak asen den adentsü, anungji tesüsabo asen telokji ochimashir ashir auer adenshiba telok amai ka dang kümadoktsü. Iba ama telok kati yimsü asünung kodaser alima ajungtsü? Iba ama yimten sobaliba tamajung anema nokdaksübaji yimten nung tepuodaki aoa metsübui yimsü asütsü nungdaker. Asenokbo yimten aser lokti nung lenir aser yimsüsürtem dang masü saka arogo nung lenirtemia tepuokdaki aotsü tsübur. Atangji, shibaibo tepuodaki onütsü? Ajisüaka, tepuokdaki ao tsübua meshitak ta bilemba telok nung medennüseti denra, ano ajiang meshitak tuluba akümer. Kasaji, tepuokdaki ao tsübua ochi o mejembitetra aser lenir kati tesayuba shitak magütsütetra, aji agi nübertem akoksadaksür aser tarutsü lima raksatsür. Tanübo linük nung, tia junga, yimten yimsüsürtem karibo tasüa majem aser tepuokdaki aotsüa metsübui pei yimten tangatetba nung maitsüi nokdakba angur. Item rongnungji Delhi chief minister Arvind Kejriwal yaa ka asütsü. Atangji, pai ochimashi inyaka ali malijibo pai aser Tsüngremi dang metet, ajisüaka pa dak tajung kaji, pai pa tepuokdak puoka ayutsü merangertem tsüngdang mapudaker aser pai pa tangatetba nung matsüngshir. Nisung dang asünungji Kejriwal daka tashimaitji alitsü, ajisüaka pa dak tajung aika rebrangtetter. Item tajungtemji pai asema süoshi nungi tenzüker pa senzüba aser pai inyakba mapa aser tongmelang taküm yimyatem agi sayur. Atangji, ochimashi, ashi auyaba aser nisung tepsetba mapatem asoshi tepuokdaki aobaji maksü saka yimten mapa nung yimten lenirtem tepuokdaki aobaji kar asoshibo tatem nung maksü masü konangang akümer. Aji oda, alima nung yimsüsürtem aika pei yimten aser nübertem nüchi kümtsünü dang tepuokdaki aoba lenirtem aika lir. Kasaji, tamangba yimsü tsütsüa mamangba purtem tanela mesamadaksünüba agi süngyanglu masü taküm Tsüngrem külema tekümtet agizüktsü osang tajung sayutsüngiba agi tepuokdaki yokba Tsüngrem temeim kulisertem aika lir. Itemji kodang bilemdangdir, pei lima aser nübertem meimba lenirtemibo tepuokdaki aoa metsübui tamajung, meshitak aser ochimashi mapatem anema tasü itta jembia nübertem anitetsü meranger aser temerenshi angu tsübua nisung tsüngdang mapudaker ta angateter. Yimten nung takok toktepdang kati ka aitsütsü aser kati ka anema inyaktsü, ajisüaka shibai ochi nung tasü itta nokdaker aser ochimashi tsüngdang mapudaker, shitakba takokerjibo, pa mesüra laji dang asütsü.

OLEMSABANG

Tanela dang masü ali shia renemshidi

~ S. T. Yapang Lkr, Kohima.

Tanü asen tamangertem rebrangdangra tanela jenjang Kotak kiküm tashi ajemoka lir, oda tetsüng külen ajemokogo ta shidi. Tanelabo joko kotak penzür, ajisaka ali shibo kecha merenem lishitsüng nung tekong tashi asonger tekümzüker mali angur, yang nung jaki pei sasa madokra shingaia tekümzüki marutsü, kechiyong ajak polashia laoa lir. Kotaki aotsü renema malir asoshi kecha mali, ajisaka arishi piyong mapang ajak intoka Kotaki aotsü tanela renemshir ali shi merenjemi alibaji tesasatsüka. Iba amala maparen nung Missionary, Pastor mesüra Deacon-tem dak meranglokli, kechiyong tamangba yabo tangar meyong masü pei agitsüba lir, anungji tamangba tsütsübo tang asen Partorba mesüra Mungdang nung ketdangbuba asenok ajak jenjang kasa dang, tuluba tilaba kecha mali;

1. BPL- Food & Civil Supply Department nungi itasen machirtem aser sensakertem asoshi jangotsü sen talangba agi agütsür/ayoker, ajisüaka itasen achir aikasa zülua lir aser ibaji Tsüngremi moatsüba ta züngshir, sensaker tang sorutsü maka, ajisüaka takartem akbok asoshi bilemer.
2. PMAY-U/G- Sensaker shirnok ali kar ki mesüteti lir mesüra ki tejen lir itemji yanglushitsütsü asoshi Govt.-i yimdaklir nem PMAY-G, jila nung alirtem nem PMAY-U ta tenüng balala agütsür ki asütsü sen agütsür, mezünglenbo asenoki tenüng zülur yokba masü Ministry nungi pa sasa shimer aru, kechiyong küm ishika jakdang asen kidang akaba osettsüset züludenyonga aru, yangji ajemdaker Ministry nungi pa sasa beneficiary shimer aru, saka tanaben nungibo Yimdak VDB aser Town nung Ward ajanga nübu kar shimer inyaka arur, tesem aika nung itasen achirbo züluka ayu, itasen machir sensakerbo aika zülusema mali, tenüng zülua senzürtem indang sen agütsütsüba masü, saka iba amala tashi nungjia süngla teinyakeri tangar sen angutsübaji mejungi bilemer asü kechibar sensaker aika zülukjemi liasü.
3. MGNREGA-Yimdaklir sensaker ayangdak makartem asoshi ibai teyari tuluka lir, ajisüaka yangia itasen achir aser takar aika züluka lir.
4. SBM-U; Swatch Bharat Mission ajanga inyakba rongnung Individual Household Latrine (IHHL) ya ka liasü, ya sensakertem metsümeshitsü ki mesütetertem asoshi liasü, saka Nagaland tesem ajak nung ama takartem yanglua aliba nung dang sen ya agizüka agi, tasen yanglubaji apara.
5. NBOCW- Labour & Employment Department nungi itasen machir kibongtem nungi ayangertem züluka teyari agütsüba tajungtibaji ka lir, saka yangia joko nisung tali kümer sensaksertem mezülukteter (shibangtoker). Ayangertem asüama nung sen lakh 2 tashi agütsür, iba den tanur ana class 10 tashibo scholarship agütsür, Mozükii ao nung teyari agütsüba den tanur asoba asoshi 5000 agütsür, ya itasen tilaka achir ama kümogo.
6. Ayushman Bharat- Ibai itasen achir asoshi masü, saka tamalen CMHIS marudangbo itasen achir aikati ya yanglua teyari agiogo, pei tashitak aser shirangba asoshia tiyazü jembitsü mesüra tiyazü nung sen agizüka agitsü jangrar liasü.
7. PM KISAN- Agri Department nungi alu ayimtsüsa ali Acre 2 tema akar nem küm nung sen 6000 agütsür, ya koda tajung, iba scheme nungsa ita nung kibongi 12,000 dang timba anguba kibong madentsüla ajimesüra iba sen meyipa meshitsü ta shia lir, ibaibo mapang shia lapoka alir, shiba temsüa ali pa/lai pei yimdak council ajanga Agri department nung form meshia yimdeni kuli agütsür teyaritem agitettsü akok, yimdenia shitakba aluyimer aser sensakertem nem dang ibai temelaba agütsütsüla, ajemesüra keno kar adokra kuli sütsür timtem ajurutsü akok.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Paris nung Notre Dame Tenla kidang Kangki tasenba inokogo



May 24, 2024 nü France yimtiba, Paris nung aliba Notre Dame Tenla kidang Kangki tasenba inokodang tangokba noksa nung angur.

June 03, 2024: France yimtiba, Paris nung aliba Notre Dame Tenla kidang Kangki tasenba inokba Khristantemi pelaa agizük.

2019 küm Notre Dame Tenla ki arondang Kangkibo tera dang raksaa liasü; taoba hopta iba Tenla kidang Kangki tasen melena inokogo. Kangkiji Normandy nungi insang mapa inyaker mongintemi yanglua liasü.

Kangkiji metong nung metre 12 talang lir aser touzük seret (kg) 1,500 lir. Notre Dame

Tenla ki rongdokba mapang nung Tenla ki kilem kolak nung aliba Kangkiji dang merondoki liasü.

Tenla ki rongdokba sülen tasen süshiba maparen nung company 250 aser mapa inyaker mongin noklang aikati shilem agia liasü.

Iba Tenla ki ya taküm December ita tashi nungbo tanaben lapoktsü tebilemba lir.

2019 küm April 15 nü Notre Dame Tenla ki arondang kilem chirepa liasü. Iba tatalokba sülen küm pongu tsüngda Tenla ki

tanaben yanglushiba maparen tatemanglen kati arudar.

Notre Dame Tenla ki ya UNESCO World Heritage site ka lir aser küm shia nisung million 12 dak temai iba Tenla ki semdanga liasü.

Iba Tenla ki rongdokba sülen alima nung Khristantemi Tenla ki tanaben süshitsü atema dollar sen billion 1 dak tema nangzuka liasü.

Tenla kidang electrical short circuit ajanga mi adoka Tenla ki arong, ta bushisüngdangertemi kuli bushitetogo.

Pakistan nung loktii azüksang Khristan, Nazir Masih süogo

June 03, 2024: Taoba hopta Pakistan nung Muslim nunger telok kati Khristan kati Quran kaket rongdoktsü, ta tai tonglokja azüksang Khristan süogo.

Arrshi küm 74, Nazir Masih June 3, 2024 anepdang züngia Pakistan yimtiba, Islamabad anasa Rawalpindi nung aliba hospital ka nung treatment tagidak mapang süogo, ta Punjab province nung investigating officer, Khizar Hayat-i metetdaksü.

Kasa anogo nungsa pa tasü mang Punjab province kübok Sargodha district nung Mujahid colony nung remogo, ta par kinüngertermi metetdaksü.

May 25 nü Muslim nungertemi Masih-i Quran kaket ka rongdoktsü, ta tai tonglokja pa dak kanga mejungi azükba den külemi Masih indang tsüngsem factory aser par ki rongdokja liasü.

Tesülen police arua Masih aser par kibong züngsemtem kümzüka hospital-i anir ao.

Police officer, Hayat-isa, Masih tasü mang postmortem agiba sülen par kinüngerterm nung agütsü, ta metetdaksü.

June 3 nü osangbenertem den jembidang Hayat-i, "Iba tatalokba ken o nung nisung 29 pua lir aser asü ngdangyatsü atema parnok ajak judicial ket nung agüja lir. Tanü-a nisung 35

maitsü jangjatsü," ta metetdaksü.

Iba tatalokba ken o dak sendakba nung police-i nisung 450 anema ken o benok aser parnok rongnung nisung 29 bo puogo.

Honibarnü (May 25) Islamist Tehreek-e-Labbaik Pakistan (TLP) züngsemtem leniba nung Muslim nunger telok tulu jagi Sargodha district kübok Mujahid Colony nung Khristantem amakdang Masih densema Khristan ana den police 10 yirua liasü.

Yaküm-a Pakistan nung Faisalabad district kübok Jaranwala jila nung Khristan anati Quran kaket shisatsü, ta tai tongloktsüba sülen Muslim nungertemi longkak aitdang Tenla ki 24 den Khristantem ki 80 dak tema rongdokja liasü.

Rawalpindi nung aliba Combined Military Hospital nung doctor temi Masih dak tekolok surgey agia liasü, ajisüaka tia makai pa süadok, ta par kinünger Adnan Gill-i metetdaksü.

Taoba hopta Muslim nunger 1,000 jungnüai longkak aita Masih dak azükba aser pa meyong factor rongdoktsüba sülen Pakistan tesem ajaklen Khristantemi longkak aita liasü.

June 3 nü Masih asüba osang angashiba sülen Church of Pakistan Tir, Azad Marshall-

i social media ajanga, "Tanü Pakistan nunger ajaki mangyimtsüla, bendang lima nung masü saka yangi ozü ng alema inyakba mapatem atema asenoki mangyimtsüla," ta metetdaksü.

Minority Rights Commission nung secretary general, Roheel Zafar Shahi-ia, linük nung Tsüngrem mezü ngmeshiba ozü ng tim mesüi amshiba nokdangtsü atema yimtenren lenir Khristantem aser yimsü lenirtemi asalentong ka yanglutsüla, ta ashi.

"Yimsü alia amangertem ajanga ano tai maket Khristan ka süogo. Tejashitsüka asen linük mesüra lenirtemi iba tebilemtsü bentettsü atema süoki ia meinyaker," ta paisa ashi.

Pakistan nung Tsüngrem mezü ngmeshiba ozü ng kübok Islam yimsü aser ainkar Mohammad mezü ngmeshibaji aibelen tulu lir, aser aibelenertem nem tasüba temerenshia agütsütsü akok.

Human Rights Watch-i ashiba agi, 1987 küm nungi atenzüka 2021 küm February ita tashi nung Pakistan nung Tsüngrem mezü ngmeshiba ozü ng kübok nisung 1,855 nem tai tongloktsüogo aser 1947 nungi 2021 tsüngda iba ozü ng kübok loktii nisung 89 tepsetogo.

ANOGO ABEN TSÜNGREM DEN

Alima tsütsü & Kotak tsütsü

"Alima shi azüapongba, tenük azüapongba aser taküm mezümeküm, alima nung aliba ajak itemi Tebu nungi masü, saka alima nungi lir"

(1 Yn. 2: 16).

Shi jangraba nung lira asenoki Tanela Temeshi leniba mangutsü. Shi tejangraba aser Tanela tejangraba teti anemer 1ir aser iba rara asenok mulungjang nung teti alir (Rom 8:12).

Tejen nisungji tasü ta asenoki teti zü ngshitsüla. Ibai telung raraji lir. Tema nung rara meliaka iba rara teti alir. Asen mulungjangi bilemba teti shisadanga tendanga alibaji rarabaji lir.

Alima meimba aser iba oset nükshibaji tanela nüktapangta lir. Iba yagi asenoki Tsüngrem temeim samadaksür aser Tsüngrem tsükchirtem akumer. (Yakob. 4:3,4; 1 Yh. 2:15). Iba tetezü asenoki kecha rongsen mebushitsüla mesüra makatsüla ta masü. Tasü ngdangbaji, iba yagi asenok agidaksür asü? asenoki aji agir? Alima nung asenok tim tepelaji Tsü ngremi maitsür, saka shitakba tetendangbaji, ibaji tokjang ta ashi dang asenoki koda agizüker ibaji dang lir. Kodaka akanga azüiter patakaji tasakba asütsü. Ne nü ngdakba dang talilabaji, Tsü ngrem den ne tesendaktep kong aser koma lir aji lir. Meranga inyakba aser talila akatsü bilemba maiteptsü kümdangang. Meranga inyakbaji Lai tesayuba Tsü ngremi mulungba lir. Talila bushibaji Tsü ngremi memulunger.

'Kechi aka iba nung temulung süa pelaa alitsü yariang' ta asenoki Pa dang sarasademdi.

Uganda nung sayutsü nggir ana dak azük

Nairobi (Kenya), June 03

(Agencies): Taoba ita Uganda nung Muslim nunger telok kati sayutsü nggir ana dak azükba sülen tenaprong tang tashi hospital nung mongdar.

Arrshi küm 27, Samuel Mukiibi aser Ephraim Duula (25) nati tesüiba küm trok tsü ngda Muslim nunger aika Khrista dangi anir aruogo. Taoba ita May 16 nü Iganga District kübok Bukwanga yim anasa Muslim nunger telok kati tena dak azük.

May 13-16 anogotem nung Nambale area nung evangelistic sentongtem nung tenati sayutsü nggiba sülen May 16 nikongdang 4:00 ako meta tena meyipa arudang awatsü ng ka anasa Muslim nungertemi tena nokdanga liasü.

Osangbener den jembidang Mukiibi-i, "Parnoki küna nokdang aser küna dang Yisu Khrista tokjang ta ashi. Parnokisa Islam yimsü amangertemi beshiba ama teküp mejepdoktsütsü merang. Ajisüaka künapronglai memelungba agi parnoki techira oset agi küna kanga mejungi yirutsüba sülen oadok," ta metetdaksü.

Muslim nungertem jagisa küna meyong Laishibatem

aser yimsü kakettebener oadok, ta paisa metetdaksü.

"Ni parnok rongnung kabo maitsü jangja. Pa tenü ngji Murshidi lir aser tangartemjia Muslim nunger liasü. Kü den külemi sayutsü nggir Duula kanga mejungi yirua tenarong nungi azü ayim, tejak aser teka tabelen mejungi yiru. Ni-a tekong raksaa awak aser tejak-a awak," ta pai ashi.

Parnoki azükba ajanga tenaprongla süchia oadok aser Iganga nung aliba hospital nung ang tenaprong shia aru.

Dauson ta ser nisung kati tenaprong lenmang nung zükdaka lia anguba sülen hospital-i anir ao.

Dauson-i, "Onoki sayutsü nggir anaprongla mejungi yirua lia angu. Onoki Mukiibi indang phone ajanga pastor dangi call asüba sülen pa idangyongjisa hospital-i aru," ta metetdaksü.

Uganda kübok Iganga District ya Muslim nütsü ng teimba aliba area ka lir.

Uganda nung nütsü ng shilem 12 dang Muslim nunger lir, ajisüaka linük anüdoklen Muslim nunger nütsü ng teimba alidak mapang shia Muslim nungertemi pastor tem aser sayutsü nggirtem dak azüker mesüra tepseter.

AO OSHI ANGAZÜKDAK:
TANÜ ANGAZÜKTSÜBA OJANG



Sürrabhong

(n) sürra tu tebhong küma alenba (bundle of palm leaves)

* Lanurtemi sürranü nungi sürrabhong kaka benloker adok.

Sürradong

(n) sürra tu adokba süngdong (palm tree)

* Sürradong talanglang küma aiener.

OLONG PAITEP # 6807

	1		2		3		4		5
6							7		
					8		9		
			10						
11									
				12					
13		14		15					16
17									18

TIPIEN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S _ _ _ _ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaket - (4)
- 14. _ _ _ hi - (3)
- 16. Akümüli nungi pilar - (3)

OLONG PAITEP # 6807 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioiktsü,
- 5. Lenti, 7. Tajangzük,
- 11. teronem, 12. Sempa,
- 13. Jahaz.

NAI-A YA METETTER MA



2024 Lok Sabha elections nung India-i world record ka yangluogo aser ibaji nisung crore 64.2 ajanga shilem agiba lir. Iba nung tetsür voters crore 31.2 dena lir aser iba osang ya June 3, 2024 nü Chief Election Commissioner (CEC) Rajiv Kumar-i metetdaksü. Alima nung electoral exercise tulutiba nung monitoring teams 68,000 aser polling o security personnel crore 1.5 ajanga shilem agiogo ta pai ashi.

Taküm Lok Sabha elections nung shilem agiba nisung ya G7 linüktem- US, UK, France, Germany, Italy, Japan, Canada ajak meyokteper voters 1.5 agi teimba lir ta CEC Rajiv Kumar-isa ashi.

Meghalaya nungi nurse 27 tashi Japan nung oa mapa inyaksü



Shillong, June 3, 2024

(Agencies): Yaküm Overseas Nursing Job Fair agiba ajanga Meghalaya nungi nurse 27 tashi Japan-i aotsü lenmang lapokogo.

Parnoki Japanese language training tembanga agiba sülen Japan nung mozü ki aser care homes balala nung mapa inyaksü.

Meghalaya sorkari "Skills Meghalaya" scheme nung shilem ka ama nurse shia nem Rs. 50,000 agütsür. Iba ya Meghalaya State Skill Development Society (MSSDS) ajanga agütsür aser tarutsü kümtem nung nurse 300 tashi yaritsü nükjidong lir.

Chief Minister Conrad K Sangma-i tesayurtem aser nurse tem den ajuruteper aser pai "Meghalaya nungi nurse tem

bendanglimai orr tangar yaritsüba atema pelar" ta ashi.

"Onoki nurse tem moatsür yoker aser parnok indang osang tajung angashitsü imlar. Tangari iba maongka agitsü jangratsü ayongzükür" ta Conrad-i ashi.

"Skills Meghalaya" initiative kübok iba training agir aser iba ajanga lanurtem dak nüngdakba skills ajungkettsü alizüng lir. Iba mapa ya MSSDS aser Department of Health & Family Welfare yaritepa inyaker.

NAVIS nung register süa aliba nurse 27 Bengaluru nung language training aser cultural immersion atema ao. Parnok rongnung 25-i N4 aser N5 exams nung takok nguogo aser mapa inyaksü tajaba aru.

Nurse 5-i visas agizükogo aser ana May 27, 2024 nü Japan-i apusoa ogo. Tanüngba

visa tem tang teinyakdak lir.

Ano nurse 14 tashi Singapore nung reju balala nung mapa inyaksü lemzükogo aser parnok ya tanga agency ka ajanga anir aotsü.

NAVIS nung Japanese tesayur 10-i training agi aser nurse temi oshi tasen angazükba nung tayongzükba aika ajuruaka tajangzük ngua agiogo.

August 2023 nung Overseas Nursing Job Fair ayonga agiba nung Meghalaya kübok tesem balala nungi nisung meyirjang 1 temai tenting agüja liasü.

NAVIS dena agency pezü sending organizations ama agizükogo aser parnok den December 7, 2023 nü MoU ka nung sign sütep. Parnoki Japan, UK, Singapore aser UAE linüktemi mapa inyaksü atema yoktsü.

Mizoram anentsüh nung tasü mang 5 mangu bushiteper

Aizawl, June 3, 2024

(Agencies): Aizawl district kübok Melthum, Hlimen aser Aibawk tesemtem nung Cyclone Remal sülen anentsüh lendong atalokdang samar nisung pungu ano mengutet bushiteperdar.

Parnok ya Ramdinsangi Thla (4), Lalvenhima Kum (8),

Deborah Lallawmawmi Kum (11), Lalthakima Kum (42) aser Matthew Lalchhanhima nungger tajangaogo.

Central Young Mizo Association (CYMA)-i search operations inyaka arur saka tang tashi parnok mang menguteti lir.

Cyclone Remal ajanga

tzünglu arudang Mizoram tesem aika nung anentsüh alu aser lendong balala nung nisung 28 tashi taküm samaogo.

CYMA-i akokba tashi search operations inyaker aser külen ketdangsürtemi June 3 tashi nung search operation tembangtsü shiogo.

**GOVERNEMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NO. DTE/ ESTT-2/02/2023-24/

Dt. Kohima, the June, 2024

NOTIFICATION

This is to notify the Central University Entrance Test (CUET(UG)-2024) appeared candidates intending to avail Nagaland State Reserved Seats for Para-Medical/ Agri& Allied Degree courses, that registration forms will be available at the Directorate of Technical Education, Kohima (Below Nagaland Civil Secretariat Complex) on payment of Rs. 400/- (Rupees) only w.e.f. 10th June, 2024 during office working hours. The form may also be downloaded from the website:-<https://dte.nagaland.gov.in> in which case the fee should be submitted in cash along with the form printed in white paper (A4 size) by hand.

Last date of submission of filled form along with CUET Score card to this office is 9th July, 2024.

(Er. VIPULHOU LHOUNGU)
Director.

**GOVERNEMENT OF NAGALAND
DIRECTORATE OF ANIMAL HUSBANDRY & VETERINARY SERVICES
NAGALAND : : KOHIMA**

NO. VET/EXTN/VFA-10/2024-25/ 473 /

Dated Kohima. the 3rd June'2024

ADVERTISEMENT

As per the Administrative approval vide No. AHV/VFA/2003/11 (Pt) 889 dated 9thFeb'2024, interested candidates from bonafide Indigenous Inhabitants of the state of Nagaland are hereby invited to undergo 2 (two) years Veterinary Field Assistant Training for the academic session 2024- 2026 at Veterinary Field Assistant Training Institute, Medzhiphema, Nagaland.

Forms and prospectus will be available during office hours at the Office of the Principal, Veterinary Field Assistant Training Institute, Medzhiphema, Nagaland as per the following criteria.

- 1. Minimum and Maximum Age for admission : 18-25 years on or before 31stDec'2024.
- 2. Qualification : Class XII passed in any stream.
- 3. Issue of Application Form : 10th -15th June, 2024
- 4. Last date of Submission of Form : 19th June 2024
- 5. No. of seats : 70 (Seventy)
- 6. Incomplete/incorrect Application forms/documents, if submitted will be rejected summarily.
- 7. Issue of Admit card and dates for written and viva test will be notified later in the local dailies.
- 8. No government job is assured after completion of training.

Sd/-
(DR. ACHILA AO)
Director

Animal Husbandry & Veterinary Services
Nagaland: Kohima.

Mexico tir inyaksü Claudia Sheinbaum shimogo



Mexico City, Aami/June 03 (Agencies): Claudia Sheinbaum ya Mexico indang tir inyaksü shimetogo, shiba tetsür rongnung mezüngbuba tir alitsü. Mexico election ketdangsürtemi ashiba agi, Deobarnü election agiba vote shilem 58 nungi 60 tsüngta taoba mapang Mexico City indang mayor inyaka alila arishi küm 61 tain Sheinbaum-i ngutetba preliminary results nung sayur. Iba yongji la den tokteper businesswoman Xóchitl Gálvez madak shilem 30 shi agi la timba akumer. Sheinbaum-i October 1 nü la indang mentor, Tir Andrés Manuel López Obrador melentsü. Sheinbaum ya taoba mapang energy scientist ka liasü, aser lai López Obrador ajanga yangluba "advances" nung maneni yangertsü, aser tir menden yutsütsü alisangi yangluba welfare programmes tem maneni yanglutsü nangzüka lir, koba ajanga Obrador kanga nungtugu akum. La bhukumertem den jembidang, "Mexican Republic küm 200 nung tang

mezüngbuba tetsürtem rongnungi ni Mexico indang tir akumtsü," ta lai ashi. Iba takokba ya la atema kisüng masü saka tetsür ajak atema lir ta lai ashi. "Ni tetenzük nungi ya jembia arur, ibai ni temaba office nung amenba indang masü, ibai yangi aliba asenok ajak indang lir. Ni nenok teimla mesamatsütsü," ta lai ashi. Sheinbaum-i la den tokteper Xóchitl Gálvez danga pelaba ashi, shibai tamakok agizükogo. Tir atema metoktepdang Sheinbaum ya Mexico City indang mayor inyaka liasü, koba linük nung yimtenren tsütsü jenjang tajung ka lir aser tir asoshi lenmang lapoker ama repranger. Sheinbaum tetsü indang Jewish nungter tetsü-tebou nung ya Nazis nungertem dang jenshia Bulgaria nungi Mexico-i jena aru. La yimtenren nung tetsüng majemokdang scientist liasü. La tebu indang tetsü-tebou nung ya Lithuania nungi lir. La tsürabor anaprong scientists liasü aser Sheinbaum

ya physics zünger energy engineering nung doctorate angu. La ya küm aika California nung aliba nungtugu research lab ka nung Mexico nung energy agiba asadanga ali aser tzü-mopung melenba nunga mongin akum. Item tajangshiba aser kaketshir asüba mapang lokti maparen balala nung shilem agiba ajanga Mexico yimtiba Mexico City nung Andrés Manuel López Obrador ya mayor inyakdang la environment indang secretary inyak. 2018 küm la ya tetsürtem rongnungi Mexico City indang mayor mezüngbuba akum, koba lai 2023 tashi inyaker tir atema tokteptsü mechi yutsü. Taküm election nung Sheinbaum ya Gálvez den toktep, koba Mexico nung aliba tetsürtem asoshi temelenshi ka ama züngshia liasü. Ni takum lia tir menden nung tetsür amenba ngua pelar, ta arishi küm 87 tain Edelmira Montiel-i ashi. "Tesüiba mapang onoki vote-a magütsütet, aser vote agütsütetdang kinungboi ashiba nisung nem vote agüja liasü. Ibaji melenshiba atema ni pelar aser iba temelenshi nung ni alir," ta lai osangbener dang 1953 küm national elections nung tetsürtem nema vote agütsüdaksüba bilemteta ashi. Mexico nung tetsür ana yakbang sür toktepba tesem balala nung benjongaka nübuyimba mapang lendong timtem ajurua liasü. Tir tasen atema kisüng masü saka nüburtemi Mexico indang Congress züngsem ajak aser state ti nung governor tem, Mexico City sorkar tekolakba aser local ketdangsür meyrirjang aika shima liasü. **(Maneni tapak 8 nung...)**

Nigeria nung union temi power grid shibangtsü

Abuja, Aami/June 3 (Agencies): Nigeria nung labour union tongtitemi national grid shibangtsü aser linük ajunga nung tayimtsü senzusenpong minpronga liasü. Sorkari minimum wage tasenba dak sendakba nung haihaura makaba sülen parnoki mapang telatetka makai longkak aitiba sentong ka tenzükogo. Tir Bola Tinubu-i taoba küm office mapa agizükba sülen Nigerian Labour Congress aser Trade Union Congress nati anir tang agi pezübenbuba longkak aiter. Nigeria indang Transmission Company-i ashiba agi, Union züngsemtem-i linük power control room tem nungi operator tem mintok aser substation trok shibangja liasü aser iba ajanga anepdang 2:29 ako nung national grid shibangja liasü. Nigerian airline Ibom Air-i

ashiba agi, longkak aitiba ajanga osang tejangja ka magütsü tashi parnoki tayimtsü senzusenpong shibangtsüogo. Kasa mapang nung United Nigeria-i ashiba agi, linük kübok tesem balala nung airport tem shibangogo aser longkak aita aliba staff temi tayimtsü inyaksangshitsü asoshi temelaba magütsür. Electricity aser aviation union temi Hombarnü ashiba agi, parnoki parnok kübok mapa inyakerter dang, mapang telatet ka makai longkak aitiba pusema mapa minyaksü tetuyuba agütsüogo. Office mapa agizükba sülen Tinubu-i kanga tasü ita temelenshi asoshi jenjang agiogo aser iba ajanga küm 30 tsüngda iba linük nung osettsüt jenjang kanga saka kümogo aser nüburtem libaliro dak kanga mejungi kongshio. Petrol nung subsidy

agintsüba sülen kibongtem aser tilateri shishilembartem nem anisüngzük agütsütsü atema union temi pa kanga nongshia arudar. Union temi Hokolbarnü sangdong ka ajanga mapang telatet ka makai longkak aiba sentong ka ayongzükba sangdonga liasü. Minimum wage dak sendakba nung sensaksem tangatettep ka dangi maru tembangba sülen parnoki iba osang sangdongogo. Parnoki ashiba agi, minimum wage tasenba ka mebenok tashi parnoki longkak aittsü. TCN-i ashiba agi, parnoki national grid lapokshitsü atema merangdar, saka Union temi linük ajunga nung tenokdangba agütsür lir. Union-isa, electricity nung tariff koba taoba ita ajungketa liasü, iba ya ajemshitsütsü atema takhangba agütsüogo.

**Office of the
Pongener Kidong 'A' Khel Mangmetong
Mokokchung, Nagaland
TENÜNGSANG AGÜTSÜR**

Pongen Kidong 'A' Khel Mangmetong ajanga Wb. Imtisashi Pongen aser Wt. Sendongkala Imchen na jabaso Sb. Akumlong Pongen-i NPSC 2023 tatidang nung Assistant Professor in Chemistry jenjang nung takok tulu ngutetba asoshi tenüngsang agütsür. Tsüngremi ne taküm aser wadang nung maneni moajang ta Pongen Kidong sarasadem.

**Sd/-
Wb. Tekatemjen Pongen
President**



**Sd/-
Wb. Shilu Pongen
General Secretary**

**Office of the
Salulamang Village Council
Rionsanger Putu Tatar
P.O. Chuchuyimlang -798614. B.P.O.Salulamang
Mokokchung, Nagaland**

SANGDONGER

Salulamang Rionsanger Putu Tatar Menden ajanga yamai sangdonger. ABAM Executive secretary anema court case agütsüba dak sendakba nung ozü senso Mr. Longpok Lemtur, Salulamang Village nungi iba ken o nung dena aliba angashia pa Tatar salangi ja-a tatsü talang ajak jembir Putu yimsüsüri pa dang iba maparen nung madentsü asoshi mepishiba ama iba ken o nung joko pa madentsü ta nangzükba (withdrawal) asüba metetdaksür.

(Signature)
**Mr. Longpok Lemtur
Salulamang Village
Mokokchung**

(Signature)
**Mr. S. meren Jamir
Chairman**

(Signature)
**Mr. I. Lanu Pongen
Secretary**

**Office of the
UNGER KOSASANGER PUTU MENDEN
(Village Council)
P.O. Chuchuyimlang, BPO - Unger Village - 798614
Mokokchung, Nagaland**

Date : 03/06/2024

SANGDONGER

(Mr. Odi Jamir, ABAM anema Okadak Ken O agütsüa aliba nungi atsünger)

Mr. Odi Jamir, permanent address of Unger Village, Ao Baptist Arogo Mongdang (ABAM) anema Okadak ken o agütsüa aliba, putu yimsüsürtem den külemi mena tatsü-talang ajak jungjunga lemsateper, pai pa sasa iba case nung matentsüla ta angateta, Putu yimsüsür matsüngdang iba case nungi tanü 3rd June 2024 anogo nung atsünger.

(Signature)
**(R. Tali Imsong)
Chairman
Unger Village Council
Mokokchung ; Nagaland**

(Signature)
**(Obanglemba)
Secretary
Unger Village Council**

NOTICE is hereby given that certificate for 1000 shares of Bharat Parenterals Ltd. In the name of Binod Kumar Jain under Folio No. BT01862 To BT01871 bearing Cert. No. From 12646 Öi 12649. 12651 Öi 12654, 11351-11352 and Dist. Nos. From 1264901 Öi 1265300, 1265401 Öi 1265800, 1135401 Öi 1135600 have been lost and application has been made to the Company to issue duplicate in lieu thereof. Any person who has a claim in respect of the said shares should lodge such claim with the Company's Registrars & Transfer Agents at "ADROIT CORPORATE SERVICES PVT LTD." 18-20, Jaferbhoy Ind Estate 1st Floor, Makwana Road, Marol Naka, Andheri (E), Mumbai - 400059 within 15 days from the date of publication of this Notice, else the Company will proceed to issue Duplicate Certificates. Place: Dimapur Date: 03.06.2024

Seoul-i inter-Korean military deal nungi atsüngintsü Seoul, Aami/June 3 Hombarnü metetdaksü. **(Agencies):** Tensa mejungi Pyongyang-i jana bener aliba süngjemshidaksütsü balloon tema South-i yokba atema South Korea-i, North den anema jenjang tapet agitsü ta military dak sendakba nung Seoul-i tekümdangtsü tenangzüktepba ya yanglur aliba metetdaksüba sülen tang iba nungi atsüngintsü sentong lir, ta jenjang agitsü sentong lir. tir office sangdong ka ajanga **(Maneni tapak 8 nung...)**

